

恥齋集坤

卷之三
關東錄

附錄
挽詩
祭文
墓誌銘

墓表陰記
行狀
共二

BERKELEY
LIBRARY
UNIVERSITY OF
CALIFORNIA

Carpentier

耻齋先生遺稿卷之三

關東錄

吾東方名山如妙香楓岳九月智異人所膾炙而
皆白頭山之支裔也然清麗奇秀唯楓岳為第一
常欲往遊以償夙願風塵世事奪我數十年之計
每與同志語不已嘉靖癸丑四月與許國善甫時
甫談及古人遠遊之迹曰昔夫子登泰山小天下
朱考亭登南岳眺山河之壯得仁智之樂有以也
我輩所愿雖不必在是蓋謀為暢懷遂理山行具
增損養老書所記初九日甲申拜辭萱堂出東小

門到樓院攤

他干切韻會手也增韻用也

飯因語關東奇勝精

神飛越已與雲山千萬疊較浩雄戒儼夫今夕當

宿檜巖寺誤入連川路問諸田父曰右右得線路

抵檜巖門前有榆五六十株林立蒼鬱綠陰可愛

是夜宿謹慎堂乙酉踰石門峴是午憇梁文驛北

川邊川即白雲山下流余脫衣濯足清流以滌煩

熱曾聞是山泉石清奇亦可耕食欲賞未果薄暮

抵豐田驛察訪黃斯文頗有分接遇款且助行資

丙戌晚踰可盧峴東向金化境謂兩君曰此地亦

可賞遂憇川邊芳草游魚添一般興味是夜宿金

化丁亥冒熱行得一樹林久憩向夕渡一大川川
有橋距縣纔數里縣前峯回壁抱是夜宿金城戍
子到昌道驛攤飯東行涉一川有橋行數里又涉
川過觀音遷遷甚懸危列柴作柵以防人馬之行
下臨大川即兩川合流處也遷盡更踰山脊而下
又涉川有橋乃普提津下流所謂普提津者出楸
池嶺之西過淮陽南流百餘里與楊口津合于狼
川縣前又六十餘里合昭陽江又五十餘里為龍
津合東江入西海行十餘里抵通溝縣時甫最後
至曰吾騎牝也有牡馬忽突馳將風之驚惻遂下

以石塊走其馬故行不得偕相與劇笑是夕吾三人共步縣門外有官柳數株散步其下始聞杜宇可卜山深已丑東行數里北折而東踰小峴而下洞府寬閑峯巒漸奇民家或依架巖下自成村落恍然入桃源國善欲知藥鄉名余見輒採請記之曰醫雖小道不可不謂儒者分內事過新院十餘里入斷髮嶺洞樹木蔽天山路懸曲將登嶺余先捨焉忽走陟望楓岳則銀巒玉峯雄盤特峙宛如漢王舉義三軍縞素層巘疊嶂聳挿危列奮若項王臨陣劒戟相向余默然念曰造化手段何如是

奇巧耶豈非清濁未分高下瀕洞為山為水大洋

掀蕩塵沙鏝散

音隆直音故也

唯有巖骨錯立於東海頭

平由嶺而東下前後行樹陰二十餘里涉大川綠
柳白沙步步明媚山禽水鳥飛鳴不避人宛然一
仙府因憇川邊川即瑣嶺之下流吾三人興闡逢
一山人問前路云若到長安寺日必落也遂促駕
行四五里踰鐵伊嶺東循山腰又北折而行川回
路曲每曲必涉川川所謂萬瀑洞下流九涉始到
長安寺寺之洞溪流幾涸松檜盡赭殊不愜前聞
余恠之國善曰論人觀物不可只見外面便知裏

面安知有無限異境乎到寺問僧曰此洞何禿如
彼云是寺去已亥災於火斫其樹創寺殆盡距京
三百九十餘里吾三人坐月臺仰見羣峰縱橫離
立各呈奇狀其最北曰觀音峰次東曰地藏峰皆
望高峰之南支次南曰普賢峯雪鷹峰之西支是
夜宿西寮寮僧智濬頗詳言山行曲折可喜庚寅
理輕裝携沙彌行思東涉萬瀑下流數里許思曰
自此可入十五百川洞遂連林莽披苦竹余先行
時甫繼至踟躕間相失國善直向彌陀菴行至一
巖俯見清潭渟泓潭之東有古城城之北有地藏

峰其形高可數千仞廣可四五十丈峽起挿空其
根不甚圓若將仆也吾二人各占巖曲距老松根
劃然長嘯乃入城更公溪越壑跨巖去去忘疲是
洞白石錯峙尖峰爭矗其峰非如長巒橫嶺左右
圍匝皆類長槍大戟甚尖削束立衝空其頭各離
立故峯後又有峯隱見束列之間直望一里若無
進步境界及至其所望之峯更作一洞愈恠愈邃
思曰自此四十里許可達靈源寺非草食者不堪
處初不知洞巒如是奇麗不為深入計乃返北歷
彌陀菴轉山腰俯望安養菴國善因卧菴前楹余

呼曰君獨迷路不入丹丘恨塵骨未蛻因與一笑
菴之小南有佛殿架窟下稍敞豁共憩窟前余欲
由菴後洞往三日菴登望高峰居僧惡其涉險無
前導者乃西下數百步至鳴淵泓深澄碧自巖之
稍塲韻會不平也
增韻亦作凹流下為瀑其高數丈其南有平

巖可坐數百人吾三人或坐或卧吟洞壑易瞑
嵐翠濕衣安養僧智卡促行曰有雨微何不計前
路若是乃緣潭邊棧路艱步而上若差一足危不
容瞥行百步許巨石錯列平流清淺其東橫峰疊
巘危挿雄盤三日菴之西支也自此泝溪行數里

許余酷愛泉石之明媚忽偃卧長吟俄而山雨霏
霏不雲而下國善時甫促步入檜陰中余退至衣
冠已盡沾冒雨投表訓寺寺門內有碑至元四年
戊寅二月建奉命臣梁載撰高麗政丞權漢切書
記乃元英宗皇帝作萬人緣舍施碑也嗚呼胡元
以戎狄得中夏正統不汲汲於名教至使異端邪
說遍諸外國可勝嘆乎住持釋熙稍可語是夜共
談山中興味數日來吾三人或並轡或聯席鼎坐
質討相與戰議然成已成物之討余與國善立幟
時甫為之從出處仕止之論時甫與余立幟國善

為之領不遺小物之戒國善與時甫立幟余謂之
可因謂兩君曰吾儕遠遊非但為山水古人或有
駕風鞭霆歷覽無際或有心胸開豁海闊天高安
得湖海精神共尋此樂耶是日行約二十里先是
與黃都事伯溫約共遊余不及期伯溫謂余不來
故已盡探內外山自正陽寺來相見慰甚辛卯朔
伯溫北歷歌歌三截修善等菴直陟而上今日初
試登險十步一歇五六里至正陽寺寺之西有真
歇臺臺之南北有檜百餘株蔽山葱鬱迢迢其下
爽若三秋入寺門內因山為臺不設闌牆甚敞豁

有老榆一株亦可住歇住持僧出迎設蒲團吾四
人或坐或卧埃闌歇刮眼回眺是日天地新晴朝
暉靜曜羣峰呈秀衆壑映露瀟漫滉漾浩浩若群
鯨爭闐雪浪接天紛紛錯列昂昂若萬馬馳突頭
鬣縱橫或如天女飛空綠衣翩翩又如群后會朝
環佩相戛余甚駭且恠之久然後辨其為奇巖絕
壑是寺正據勝境山之真面目盡露於一矚最一
頭地也余倚杖而更望之雄盤東北尊嚴難近者
毗盧峯也尖峯兩角聳出無倚者香爐峯也香爐
之西有奇岩隆起如卧龍者金剛臺之峯也香爐

之北素壁長圍或散為橫峯或類為尖巒不可殫
記其可指者自毗盧之西北有衆香城衆香之北
有永郎站永郎之西有水精峰水精之南有大峯
七其一船菴峰其一伽葉峰其一圓通峰其一獅
子峰其一摩訶衍峯其一白雲峯其一萬灰峯其
一圓寂峯自摩訶衍之南有穴網峯又其南為望
高峰望高西肩有石鷹有僧床皆形似故也自東
而南西三面宛如列屏巖巒雖不相屬恰作一橫
嶂尤可奇者是夕雲掃碧天落照流光香爐以北
雪屏橫開穴網以東日出月出諸峰露立如銀甚

可愛也況是夜山月生輝萬境俱寂魂骨冷清閑
戶靜坐夜深不能寐若得養此夜清明之氣像竟
做去人欲淨盡天理流行境界則有為者亦若是
豈欺我哉壬辰昧爽獨立前臺徘徊靜玩俄而旭
日轉上峯巒呈輝洞壑爭媚珠列貝立可恠可駭
恍若吳商越賈身立市衢目眩奇貨更如梓匠輪
輿持斧入山杞梓滿前觸目異態氣像萬千是朝
伯溫向歛谷遂出寺東門循山腰二里許折而轉
北行樹陰又五里許有晉賢帖暫憩安邊僧普明
亦憩遂共行三里抵開心菴菴西有臺騰身而陟

地勢高峻俯視內山西南諸峯昨日在正陽仰見者盡在杖下歷開心東南行樹陰而下一里許有天德妙德二菴天德門有靈川申扞城紀行錄又三里至圓通菴天德及是菴皆幽敞欲止宿有病僧乃涉一澗行二里踰小峴至佛知菴日正午也菴無僧令淨掃火其堦竟夕靜息愛清閒也夜半遙聞諸菴鍾聲如來自九霄又見西峯有若星芒遠照蹴圓通僧來宿者問何物曰開心菴佛燈癸巳晚陟菴北石逕穿樹陰踰二小峴而東下約五里至獅子妙峯二菴庭前有赤木七八株清庇可

愛時摘木蓮花相與嗅之又二里至摩訶衍菴前
臺有曇無竭石像入寺日將已也有釋惠能出迎
因示摩訶衍事蹟有山鳩來止楹下不避人夫鳩
微鳥有色舉翔集之智可以人而不如鳥乎菴西
南海松赤木楓檜擁立成林佛殿最清幽徘徊
望東有峯八北有峯二東北之間無數尖巒或全
露或半露南有峯七其一穴綢峯自前楹而望有
穴如窺口通見無礙峯之得名者此也是山處處
有五加皮木蓮赤木冬青側柏至此則岩隙崖頭
皆海松最多者楓樹山之得名蓋非虛語若霜落

湖山秋深溪壑丹染紅老天地淒清峯益呈奇石
尤露恠風行月宿徜徉歸來則朝北海暮蒼梧想
不多讓也覽已讀心經夜氣章惠能絕粒者連夜
燈燭與之共宿甲午約遊萬瀑洞時甫堅卧不起
曰寺甚可栖願留數旬日向午過妙逢菴一里許
至獅子頂有石頗類獸形其下有火龍淵最深不
可測又行一里岩路斜懸扶藤蔓以下西有峯四
一為潤筆一為香爐一為香爐之次峯一為金剛
臺東有峯三皆穴網峯之北支也涉川而東綠雲
梯石磴甚懸危磴盡有階三十四級階之北崖有

菴架岩結二間為僧寮寮之小西立二銅柱高可
百尺構半間於柱上其內安觀音塑像一軀以二
鐵鎖一釘其柱著一端於石一圍其室著兩端於
石其北有普德臺與香爐峯對峙此普德窟之大
緊也自雲梯緣東崖下至川邊白岩平鋪可坐數
百人吾三人掬水相戲嘯詠忘歸令僕夫炊飯岩
西有海松一大株枯立宛如白龍昇天余戲題八
絕句書其樹國善時甫亦繼和之西下一里岩下
見舍弟應休丁未春雲遊錄向夕攀緣石路白石
滑澤赤足行不繭行三四里至金網臺下柱杖少

憇普德僧指西崖曰青鶴常養雛于此今年不知
去何處也是洞以萬瀑名者蓋一大石成一洞壑
而自火龍潭下為黑龍潭又其下為凝碧潭又其
下為碧霞潭故瀦為潭流為川瀾為瀑其瀦其流
其瀾不可殫記然衆壑之流必為川一川之水必
有源余默記之瀑之源有五一自毗盧之東一自
毗盧之南所謂鴈門圓寂二川合流于鴈門峯下
一自萬灰之南一自摩訶衍之東合流于穴網峯
下一自船菴之西抵合于望高峯之北蓋內山之
水盡注于鳴淵與百川洞合于長安寺之南百餘

里八于楊口津與狼川津合也是夜又宿表訓寺
東上室乙未欲登望高峯驪江驪寺僧志能惠普
自五臺山歷遊水雲浮蹤適邂逅甚喜倒驪江余
之庄是僧見而喜人情也携二僧涉寺前川南入
檜林一里又東折達乾川而路甚艱阻步步止歇
行五里有古城基自此而南可下三日菴又東北
並山腰而五六里有大小松蘿二菴皆有絕粒僧
問其名西行修東法蓮年皆戊子氣貌稍清閑可
語小菴之北有臺直俯萬瀑余憩焉令蓮具午飯
自大菴東而折上行三里又緣西崖僅容兩足自

此至山頂側栢蔓生故或攀枝或扶根而行又一里許至一小峴俯視絕壑杳冥精不能定良久並岩側背腹俱盪磨而過僅容一足幾數十步又有岩拆裂如溝過此者輪身而下有鐵鎖釘岩為扶下之具其下東南有線路可向上雲岵又數百步鐵鎖垂岩腹比前鎖最長余先扶上令二僧攀余足故僅陟又十餘步有鎖不至艱危其西有僧床石鷹兩石惠普忽陟僧床之上余止之又數百步至望高峰峰甚峭削其上可坐十餘人余抱石角四顧無倚但覺心眼俱爽也峰之為臺三角離立

乃成一峯北對一峭峯差卑西走一長巒散為三支南之二支為百川洞之北峯西之一支為表訓寺之南嶺是峯聳然特出於內外山之間百川洞諸峰在開心臺所不見者也余指以記之毗盧在其北日出月出鴈門在其東彌勒白鷹在其南水站在東南自水站北延十餘里為穴網峯自彌勒西分為十玉峯南分為雪鷹峰直抱百塔洞為長安寺之南麓覽已乃下至磨腹處徑踰岩頂不甚危暨下松蘿則蓮已具飯共攤療飢菴之東有窟窟有水層積始覺天氣尚寒殊不似南方天將夕

林壑陰翳山氣蒼茫遂從故逕而下還表訓往返
約四十餘里少選黃察訪仲洽李都事景安是朝
自長安寺來游萬瀑洞相見慰倒共坐禪堂行酌
數巡丙申之朝黃李二官向正陽寺國善時甫病
不從余明日向楸池嶺黯然之恨可已乎去十五
日偶見冠松絡者問其名性淨也因請毗盧峰九
龍澗路欣然荅曰我曾從趙景陽遍歷耳長安及
表訓僧皆止余之行及得是僧喜之甚携淨及驪
江僧更由萬瀑洞歷摩訶衍行一里有般若菴又
一里有巨彬窟菴菴之東有一樹淨曰此桂也其

葉似海松生枝距寸許如聚針然其皮色果如桂
割以啖之味頗辛酸不類桂蓋木蘭耶又二里有
知佛菴距菴南四五十步有泉自穴中涌出淨曰
甘露水也青鶴栖此洞必飲此水行涉一澗循澗
東轉旋而上長巒近抱橫崖曲圍清流白石至此
加奇麗西距獅子峯可十里其最尖數角露出乎
前巒如人據牆而窺亦一玩也渡一略約陟澗邊
平石石臨深潭左右松檜蒼鬱令人發出塵之趣
如入赤城而謝人間潭之北岩刻佛像殊雄魁佛
前有古塔東行三里許又涉澗踰一峴峴之北有

谷爵邃淨曰此萬灰菴洞而洞北有萬景臺白雲
菴又行四里許有妙吉祥菴菴在溪邊水石清曠
南有峯四北有石壁削立者一入菴攤飯有衲希
則自文殊菴來謁曰貧道入此山幾三十年今敢
塵雅量與之語果略涉其學因與縱談山中樂事
嗚呼縹流方飛聲兩宗馳心釋科此衲獨守靜蓋
釋中之沮溺也又行五里有兩川合流循川而北
有石迳積葉沒膝人蹤難尋淨曰此圓寂洞也洞
壑迥邃一鳥不鳴北行三四里涉其川有古圓寂
新圓寂兩菴各有絕粒僧古戒心新學仁菴東奇

峯鳳舞鸞翔自北而拖于南麓西長巖虎蹲龍走
自西而擁于東境界清奧非烟火食可栖止處是
日行約二十五里夜宿新圓寂菴此洞無雜木側
栢老松蔓生繚山丁酉向九龍洞約同行今夜露
宿岩下沿前川而下三里許東入林莽數百步冬
青雜生蔓栢塞路不能前乃下循鴈門川西邊而
上又數百步兩崖絕壁對峙如門其下為深潭路
阻絕更緣西崖攀樹枝以行四五十步又下川川
流清淺平岩長鋪或潭或瀦崖益開峽益狹行二
十里許天陰嵐濕細雨或洒寒氣凜凜燒褶拙以

自燠倚蒼岩曲肱假寐有頃淨忽促行曰天其晴
矣余樂之努力以行三四里天陰如前嵐雨益寒
衣裳盡濕從者皆以雨辭余從其計是日往返約
五十餘里夜宿古圓寂菴戊戌之曉淨出觀天氣
曰今日快晴可登毗盧促晨鋪黎明循菴西川
無水跨越澗壑直北行十五里許有二川合流余
從東川七八里或緣絕崖或扶蔓稍步步難進至
山腰岩流成坳清冷可飲石隙無他草唯見山芥
已老當歸叢生肥大株百餘莖令配干飯余道遥
暢吟飯後更挾石角五六里許方登永郎岵俯見

千峯萬壑竒恠之狀稍舉其槩而名言之有若人
形有若鳥形有若獸形所謂人形者如坐如起如
仰如俯若將軍整陣百萬軍卒橫槊揮劍爭馳赴
敵若老釋談空數千緇衲亂著袈裟急回精進所
謂鳥形者翼如啄如呼雛如尾通如或如鴈陣整
翼成行點列秋空或如孤鸞隻影徘徊飛入鏡中
所謂獸形者若蹲若伏若走若卧如群羊散牧日
夕下來如衆鹿走險失足驚墜自今思之望高萬
瀑之所見盡為兒戲自岵至絕頂周迤四五十里
間海松側栢皆嫌風靡蔓交覆濃碧籠翠其高可

數三丈人行其上如履草架驪江僧志能蹉足而轉四五十步不墜下又四五百步登毗盧峯周回四顧浩浩漫漫不知所極飄飄若駕鶴昇天雖飛鳥無出吾上是日適天地快霽四無纖雲余謂淦曰觀水必窮源登山必陟高不可無要領山川區界能歷指乎淦頗指示之自白頭而南馳幾二千里至淮陽為鐵關嶺東起為嶽池嶺雄迤百餘里至高城為是山而至此峯峻拔東蟠而窮焉支峯齧壑競秀爭馳不能究其數北則周繚長峙直圍隱雲者六鎮之山歟萃律特秀只露尖頂者妙香

山之峯歟余嘗閱地圖謂咸鏡郡邑直列海涯今
望之豆滿以南諸鎮自西而截入東海東則大洋
瀰漫接天無際嶺東諸郡沒見於明沙大湖之間
南則青螺點點庾橫縷縷眼力微茫霧氣漫空不
復辨也西則落暉莽蒼天色杳靄不知其山與海
若山之可指者若劍山永興若五道若黃龍安邊若雪
岳襄陽若五臺江陵若雉岳原州若頭陀三陟若猪山楊口若
清平春川若龍門砥平若白雲永平若天寶楊州若天磨若
聖居開城若寶蓋鐵原若首陽海州若九月長淵或如培塿
或如劔鋌唯猪山雉岳稍隆屹雉岳之南有山隱

浮雲天間人謂智異山未可詳也是峯有三支其一東延為日出月出九井等峯即九龍淵之西自月出南折為鴈門彌勒雪鷹等峰自彌勒西轉為十王望高穴網等峯即萬瀑洞之東其一南走為圓寂峯其一北蟠為永郎岾是岾散為西南內山之羣峯即正陽之東也令從者誌之倚岩獨立浩然長吟遂占石隙題同登覽已從故徑而下還圓寂攤飯南行三里更涉鴈門川穿樹木中蒼藤翠杉或迷去路又行十里路極艱危正所謂後人見前人履底前人見後人頂上扶緣木叢始登鴈門

峯脚力甚憊籍單卧吟不堪酸苦自此峯分內外
山內山皆石也及踰是峰始履土東下五里許宿
上院寺是日行約八十餘里已亥之朝呼淨曰時
然而靜者吾知其為山而體其靜可以充厚重不
遷之仁淪然而動者吾知其為水而察其動亦可
體周流不滯之智況自早昇高泝流尋源學者事
也若以極頭地為可追十分用力有脚踏實地之
勇則吾猶可及古人不知汝家亦有是耶昨日之
登汝所得云何飯後東轉山腰過九曲岵幾五六
里有大歲岩洞岩石潔白川流清曠略與鴈門洞

相類又五里北折而上有繼祖窟菴菴東北五六里登九井峯峯乃巨岩盤峙峯南有木梯不甚高見岩曲或成坳澗如井者不止九余昔年嘗登頭陀山之五十井峯比此愈奇巨彬窟前所謂桂者至此峯無雜木皆其樹也遂東行叢林間三里許有上草簾西下澗谷五里有下草簾皆無僧又四五里有雲栖窟菴雲栖之西有外開心菴外山之水從注于菴前即十二瀑也雲栖之前平岩長鋪澗流清緩余樂之靜坐岩上忽忘日晚淨催起東行五里至寂滅菴菴在十二瀑之東北主衲智熙

極辨山家之味攤飯後踰一小峴憇栢田菴東踰
三小峴乃登歡喜站倚杖獨立海天微茫東望石
峯東峙南看杉檜蔽天平生壯賞盡在此境也西
並山腹石逕崎嶇非有拄杖吾何恃乎南轉十里
更陟山脊東西皆杳冥絕壑若蹉一步幾致墜下
所謂小人串也余苦歷艱危謂淨曰此峴如是險
阻真小人世間萬物名不虛得淨然之自此行十
五里間為峯八去去愈阻小人串之西有圓通串
自圓通可陟十二瀑川川西有成佛佛頂等菴淨
曰榆站外山之巨剎何不歷賞余曰儂為山水為

遠遊為清幽以為泉石則萬瀑洞盡也以為登眺
則毗盧峯獨也況地有高下景有大小故高者下
之積大者小之極高且大已為吾目所收小且下
何必勞吾足又有說焉高下大小物也以萬殊則
吾之動靜非物之動靜以一本則物亦吾也以二
視則山之蒼然水之渺然吾徒知形色之亂吾耳
目以一會則蒼然渺然皆吾性情中物道無物我
理無彼此見其大管其小舉其高喻其卑固亦無
害於道此吾不賞榆岵之意也語已仍涉一川抵
鉢淵寺是日行約六十餘里庚子晚朝住持性空

引余至寺後岩岩上有碑乃新羅僧律師嚴骨之
碑高麗僧瑩岑撰承安五年五月建碑側有枯松
一根二株今見一枝枯一枝生率淨及寺僧往賞
寺西瀑流則一洞連一石長壁橫開白滑如銀瀑
之擊瀉或曰為深潭流之淺布或龍為長溝若出
人手緇徒故事折草坐其上隨流直下迅如走馬
其熟者巧轉而下不試者或正或倒頭足橫轉沒
入潭底令淨試之不曾慣者倒頭橫身余不覺齒
冷然身膚不傷人不厭其戲辛丑朝雨晚晴借住
持馬載行橐因騎之出寺洞一里有潭白石如白

科其園可數百尺上有潭水流入其中又溢為潭
可與萬瀑爭甲乙淨曰見此曰潭亦九龍漱之伯
仲東行十五里許踰小峴平原廣衍又踰一峴原
野如箭呼淨曰若携雞犬牛犢以來誅茅卜居汝
自山中訪此孤蹤共討方外樂乎二里許漲大川
川即九龍漱下流自此距龍漱想十餘里以國善
時甫久留通川我行惡欲往未遂行三里出海路
即靈津串也過一小湖三十里許有菟遷遷臨海
甚危歷朝琮驛十里許騎從自通川來又二十五
六里抵宿登路驛奴金呂碩家是日山行二十里

海行六十餘里壬寅黎明沿海行二十里蒼松夾
路松外明沙沙外大洋青驢弄鞭二僧前導行色
幽閑有飛過洞庭之思又七八里抵通川會兩君
于清虛堂前有蓮塘可詠約遊叢石亭亭距郡
十八里北踰小峴又折東行可十餘里沿海有長
巒蜿蜒走入海口亭正在隆隤處東臨大洋北俯
四仙峯截立海中高可數百尺其峯東百竿柱柱
六面如繩墨巧削甚平直每峯巔各戴六面圓石
其款豎者其半頽者縱橫數里不可勝歷三面海
岸皆東六面石柱則盡一巒皆東一石條若風掀

汰沙岸裂崖頽不知更作幾許峯也時甫曰昨間
曾乘舟並岸歷賞絕海東北十里又賞穿島尤奇
恠余欲繼之海人曰風惡不可以舟未果嘗見李
稼亭東遊記稱國島比此峯尤勝則不知造化何
至此極乎向夕風力益掀雪濤衝噴或湧起數百
尺真壯觀也俄頃海雨絲絲冒叢而返是日海行
四十五六里陸行三十里癸卯之朝尹郡守設慰
酌吾三人醉舞而罷是日晚行十里許余獨躍馬
東向海溼欲觀金欄窟計也兩君笑指曰必醉迷
路余到金欄山下漁人曰必登舟可入今風不能

舟遂坐沙岸浩詠良久南行二十里到門岩岩對
立如門忽見波頭有物甚鉅近見之乃死鯨其長
可五十餘尺其形魚也其腹可吞小舟其鬚生額
下海人曰鯨有大小此鯨之小者是日抵宿朝
珍驛海行六十餘里甲辰行十五六里憩靈津串
有湖湖周可五六里駐漁店攤飯漁父持生鰻文
魚海蛤足供午厨又行十三四里過養珍驛涉龍
湫下流是日抵宿高城海行三十餘里陸行三十
餘里乙巳東行七八里到三日浦浦周可六七里
遠近重峰隱見合抱所謂三十六峯中有小石島

島上有茅亭亭有古松六七株皆蟠屈高古黢影
湖心東岸有夢泉菴令漁人釣得黃魚若干膾炙
之輕風細雨又助一般興味酌數巡舟又泊島北
小石峯下緣岩而上峯頂有埋香碑元至大二年
己酉建由碑側而東十許步南崖石下果有丹書
述郎徒南石行六字前輩為四仙所題年代久字
畫不泯人異之然安知好事者偶以朱漆戲之耶
丹書下忽見恐聞三夜字伊齋筆遂傍題南谿東
村又棹舟緩楫乃賦三日浦辭及二律景物蕭森
真絕境也是日行十五六里五月初一日丙午朝

性淨向榆岾寺南行三里有南江江之源三其一
發毗廬東為九龍湫抱日出月出九井三峯經大
明菴過溫井流二十餘里與鉢淵川合所謂世尊
百川其一發歡喜岾東歷小人串過鉢淵寺流十
五六里與龍湫川合其一發九井峯西過雲栖窟
外開心菴為十二瀑流十餘里與榆岾寺川合所
謂城門城門栗谷云當
作聲聞佛號也百川蓋東南流為舟淵又
南流為黑淵轉而北流為箭灘至此為南江東流
入于高城浦遂登樓船而渡是日雲蒸霧縈楓岳
東支不能快觀物為祟也行六十餘里憇明波驛

攤飯行十餘里過烈山縣縣北二里有大湖周可
數十里包跨陵谷瀟漫浩汗諺傳大水懷襄時舊
縣沉在水底天晴波靜則墻屋依然可見不知詳
也涉巨吞川宿杆城郡民家是日海行百一里丁
未之朝金郡守斯文邀之吾三人暫拜行十一里
抵仙遊潭有亂麓周遭成谷谷中有湖湖之南小
峯斗起半入湖心長松虬屈成陰憇其下葦葉滿
潭真佳境也又行七八里沙色如雪人馬行則鏗
然有聲是鳴沙也嶺東海路皆然而自高城至此
尤多又有海棠或亂開或已結子亦奇玩又行上

凌波島島西連沙路絕巖斗入海口奇岩怪石縱橫錯峙吾三人各占一峯坐玩是時海天明媚滄洲萬里軒豁呈露俄而東風忽作怒濤衝岸如千兵萬馬馳突又過一大湖行松逕二十里抵清澗驛驛亭距海纔十步小東有峯峽起其高數十仞上有虬松十餘株其下亂石嵯峨聳插海澨俯見海水清如銅鏡或風濤觸石飛雪四散東望海天落日明妍西望雪岳雲雨潑墨海夫四五沒入十尋之浪採石決明是金斯文為吾儕供是日海行四十五里戊申之曉霧暗不得觀日出天其使余

不遂壯賞也北旋而行又南五里過廣湖又十里過永郎湖湖周可二十餘里汀回渚曲岩奇石怪湖東小峯截入湖心海路處處防風亂生令僕夫採數百根又五里過雙城湖湖西十餘里有石峯直橫如藩即籬山俗云泣山湖東又有石峯峭拔有徑如線連陸即秘仙臺又二十三四里入洛山洞西行又東入林路抵洛山寺寺東臨大洋景趣可翫得句示同行云地疑甘露天浮水境勝姑蘇海作隣是日海行六十餘里宿東別室開窓遠眺忽見群鯨噴水亦壯玩已酉曉又海曙不得見日

出天乎天乎是朝東踰小峴披綿竹一里許佛宇
二間構在窟上海濤常出入其下聲振洶湧深不
可測往持休靜頗通其學稍驕黠余不與之語是
午行七八里過大浦浦萬戶營也又五里許有大
川憇川邊攤飯文抵襄陽庚戌雨向晚為金基福
所挽被主倅南斯文酒醉倒辛亥雨前江甚漲不
得渡壬子不晴又被酒再倒癸丑基福向楓岳吾
三人醉南斯文與朴察訪子正同舟渡南川行二
十五里投柁雲驛子正主人也被酒劇甚甲寅行
二十五六里憇觀瀾亭亭臨海長松萬株擁抱東

南亭西二里有銅山館又行至連谷縣境海曲處處竒岩恠石不知其幾沙白海碧清興難收余忽下馬投沙上轉身而卧若狂者焉人或謂之狂自連谷又十五六里見松間有大湖隱映國善時甫曰此非鏡浦乎余謾之曰非也行數百步纔過松林明沙無際鏡面新磨峰回渚曲其周可二十餘里國善時甫曰真鏡浦也余拍手一笑共下馬散步江門橋有頃殘月已映松海間乘昏投江陵是日海行九十餘里陸行十餘里乙卯金府使斯文慰留丙辰辭主守余先出賞祿煩臺臺在客館之

北俄而國善時甫已向鏡浦余追至共穩賞呼國
善時甫曰所歷陂澤不一而林巒粧護夕陽虹橋
人影倒行最此湖之獨擅况直東而望湖海相連
其間有白沙若布練細視之乃沙岸直橫向夕西
北行二十餘里抵丘山驛丁巳自曉迄朝細雨冒
簑入大關嶺洞洞壑頗幽閒清川白石略與楓岳
九井峯之洞相似三涉川行五六里至濟民院雲
霧晦冥登半程峴歇馬相與擁簑而憩嶺路為雨
所噬人馬顛仆謂同行曰海霧長卷萬里滄洲一
望無際寒松鏡浦如在脚下稍有湖海之樂豈不

顧戀遂登嶺雨止由嶺而西下前後行樹陰二十五六里涉大川抵橫溪驛攤飯山嵐稍散寒風大吹爽如九秋是驛正在山脊天寒先至四月冰消八月下雪故居民只種鬼麥為生甚可憐西行二十六七里過禿山院至省野望五臺山欲探十年之迹恐阻雨仍過涉五臺川川之源發滿月麒麟長嶺象王智爐等五峯之間潺湲汨瀟三十餘里至月精寺前為金剛洞又三十餘里至旌善境與希福嶺西川合餘糧驛之北又百餘里經寧越郡南入竹嶺江蓋是川為竿筒水初發西臺之下色

味勝常西流數百里為漢江入于海漢雖受衆流
此水為中流若中國之有揚子江出權陽村記是
日抵宿珍富驛戊午西行七八里路左石峯屹起
臨大川頗可愛呼時甫曰此清心臺也時甫揮惠
寶獨登余與國善至毛老峴秣馬時甫至共入樹
陰前後行二十餘里天日不漏長川亂流禽鳥不
鳴人行其間疑入天台境界又行七八里至大和
驛攤飯行三十里過芳林驛路一峴涉大川川之
源發毛老峴之西西南流四十餘里為平昌北津
東南抱平昌郡西繞琚瑟峴百餘里入于竹嶺江

是夕宿平昌郡吏家已未冒雨過藥水遷踰琚瑟
峴至沙川遷川之西石峯遷迤直圍五六里間因
憇沙岸時細雨稍歇青嵐帶壁川流漲急亦佳境
也是川自昨三涉皆有橋行十餘里驟雨忽作路
甚濘艱關到酒泉縣落照猶含西嶂庚申終日雨
留酒泉與權司成大手賞江漲辛酉或晴或雨是
夜江月流輝忽有白霧起自江中繚繞周幕如大
湖接天或起或滅或斜或圓盡閣隱見其間乃清
虛樓也夜將半猶不能寐因詠歌數曲足遣孤遠
之抱壬戌踰松峴扭峴涉一川過神林驛踰可理

峴又涉川至丹丘驛前吾三人共倚橋欄繫馬汀
柳奴問主家日已暝也乘暮投原州癸亥甲子阻
雨被李牧使斯文慰留乙丑西行十里出曾大父
墳塋下不堪松楸之感下馬拜過忙不得循繞丘
壠情禮俱泯過蛇遷踰鞍峴行三十里至安昌驛
前岐國善時甫向興原倉約明日至梨湖同舟余
西行十五六里踰松峴暮抵東村自臨瀛距此四
百五十三里統計陸行九百二十三里海行四百
五里山行二百八十里五月壬申恥齋記

關東山水之勝甲於東方而金剛山獨鳴於

天下等書之所記載元帝之所捨施 大

明高皇帝之所歎異夫以處天下之絕域而
騁天下之雄名何其偉哉世之士苟有志於
方外者咸願一窺於此山而朝市眷戀雲霞
懸邈岷嶺之想徒勤而仇池之夢已罷者皆
是其幸有一二之往遊能窮竒極壯而得一
山之要領盡一方之鉅麗者蓋鮮矣夫名山
異境實天地之秘藏靈真之窟宅亦豈人人
所能覩哉吾友上舍洪君應吉學問之餘雅
有超世之志今年夏四月與許上舍國善南

上舍時甫相約為關東之遊首尋此山而登
覽焉已而歷叢石泛鏡湖徜徉巔海之間充
然其得浩然其歸余既以不得同遊為懽於
其歸也亟徵其遊錄而讀之於是益嘆關東
山水為天下之壯觀而遊山之妙觀水之術
惟洪君能得之也且夫金剛為山乃造物逞
技之所就岡巒洞壑合沓頽洞鬼擘神挈千
變萬化莫測其倪使驟而觀者錯愕睢盱眩
東迷西曾不得其髣髴今是錄也自淺而造
深從卑而陟高皆有次緒於山必辨其脊脉

於水必究其源委縱橫徃復羅絡條達百折
千回無所漏闕歷險履艱而氣彌厲窮深極
遠而志不倦悅與妙耽幽靜而不墮於玄虛
好奇恠尚詭瑋而不隣於荒誕至其登絕頂
而撫六合傍日月而超鴻濛觀瀾鉅海濯纓
清湖而感慨不歇樂之無窮則其有得於胸
次者豈特巍然其高坎然其深者而已哉其
必有所謂妙與術存焉而狀物之工記勝之
義有不暇言矣抑余於此復有所感焉昔孔
子登泰山而嘆逝川朱子登南嶽而咏九曲

夫之山與之水所以能深發聖賢之樂如此
者何耶余生有山水之癖夙慕關東之遊病
過半百局促塵埃亦朝市眷戀之一耳而洪
君與二子志同道合乃能為壯遊述奇勝以
發我胸中襮積礪磊之累滯豈非余不幸中
之大幸歟雖然登山臨水可以日月而效聖
賢之為者諸君既效之矣知及仁守其所以
有樂於斯二者余與諸君盍相與終身勉之
哉然則身歷之所契乃夢想之所渴其亦有
以辱教之又幸之幸矣

是歲重陽前數日真城李滉謹書

曾紀東遊錄中二律今錄呈以博笑

麗澤深情在琢磨清遊論說互崇加吾儕萬
理須探極異學千歧自擅家天待人修方合
一道從時否幾成差老夫不及聞餘緒空愧
賡詩損至和

右天道人事異同之論

又

瞿曇當日亦勤修禍劇懷襄億萬秋尚有衆
門慕精苦如何縫掖事輕浮渠功極處藝倫
滅此道成時物我優寄語韓公須自得由來

稗穀本非俾

右譬山僧稱稗有秋之句

跬步相阻殊為惘然今日伴人初傳果誤
再傳則非有誤也屢欲邀語寓舍湫隘煩
鬱未果如得稍清曠慶日日對床固無厭
而寧有所耶

景浩

余友洪上舍應吉求道甚切不幸遭親喪
過毀滅性痛哉應吉曾示余以遊金剛山
錄余為之叙題今不復能記東歸船上偶
逢一僧乃所與導遊山者能言當日探歷
事余感涕久之聊以一詩見情云

楓嶽久聞天下勝洪君可惜後來賢
盪胸曾喜憑遊錄隔世今嗟遇伴禪
只為相從同學道非緣長往獨求仙
冷烟風雨驪江上回首平生思惘然

隆慶己巳暮春退叟書

元韻

朴栗

追隨應吉曾同泮心仰心工近古賢
癸丑年中乘欵段毗盧峰上問高禪
人云眼大尤容物天為樓成喚作仙
偶值元賓相與者旅窓疎雨意茫然

天下之山水莫奇於三韓而關東為最關東
之泉石尤清絕者金剛洞壑是也遊觀之士
文其勝者非一惟南陽洪文得其髓焉其文
詳而不繁麗而不誇山之根脉水之源流吞
雲吐霧攢林叢石千態萬狀一筆盡收無復
餘欠使覽者不出戶庭而萬二千峰瞭然在
目文至此可與山水並其奇矣余因此有所
感焉天壤之間物各有理上自日月星辰下
至草木山川微至糟粕煨燼皆道體所寓無
非至教而人雖朝夕寓目不知厥理則與不

見何異哉士之遊金剛者亦目見而已不能
深知山水之趣則與百姓日用而不知者無
別矣若洪文可謂深知山水之趣者乎雖然
但知山水之趣而不知道體則亦無貴乎知
山水矣洪文之知豈止於此乎洪文諱仁祐
字應吉於珥毋黨為尊屬少而志學長而篤
行其於道體庶幾有見矣不幸早世余悲其
不克大成而有感於斯錄僭寄輶說於卷末
焉丙子仲春德水李珥書

耻齋先生遺稿附錄

答南時甫書曰昔年與君及應吉諸人相從之日
切偲之益甚多暮年作意之功專籍於是而不數
年間死別生離無復前日之事鄉間雖多有儒士
率為世習所奪無與論此事令人心緒日孤景浩
與趙士敬書曰洪應吉遊山錄前日欲覽故送呈
此人有學有文遽至不祿每深嘆惜

景浩

左議政沈喜壽書黃驪志曰生負洪仁祐字應吉
孝悌忠信出於天性自少篤志聖賢之學堅苦刻
厲真踐實履端方好禮動慕古人所交皆一時賢

士如退溪李先生最相許能文章拔出流輩而屢
舉不第亦不屑意有耻齋遺稿行于世年纔四十
居父憂過毀而卒國人惜之即明廟甲寅歲也
墓在州北大松里宣宗朝以其長子進貴贈
爵領議政最後因士林公議配享沂川書院

挽詩

僉知中樞府事李滉退

溪

義質仍資學力強芝蘭不來自芬芳百年我友期
三益一歲君家有六喪鬼惡天高難究詰兒啼慈
哭太冤傷那知舊擬驪江約永隔修文地下郎

又

戶曹正郎楊士俊

唐城洪應吉出處世人知主敬齋何耻存誠志不
欺風儀山有立正色玉無瑕枕草偏知禮經病未
賴醫遷坊餘面教仁里失肩隨樹德薰雙季裁成
屬二兒半塗生也短辭母哭之悲春雨驟江路舍
哀忍寫詩

吏曹佐郎金貴榮

志學常堅喫菜心半生攻苦孰知音人期致澤終
無命念絕輕肥上有臨風樹此情仍不幸皇天今
日最難諶偏親弱婦諸孤幼不昧精靈恨亦深

祭文

僉知中樞府事李滉

退溪

嗚呼眷眷孝友之實懇懇樂善之誠燁燁才華之

義孳孳學問之明天之何為既賦君以如是之厚
而乃獨壽之蚤而禍之酷耶滉百疾纏身人事恒
闕病不視而歿不食奠不躬而葬不緇慙負幽明
淚在襟袖倩奠薄酒君其歆右嗚呼哀哉

成均館學官許曄

草堂

維君溫恭孝悌得之天性又屬于學維日居敬克
勤小物兼有文學斷斷自期崇德廣業與我作友
十五六年一見如舊不約而堅每見必喜每談必
洽君聞以警我聽以飭世故拘牽不能同榻沉恨
常存從朝及夕信音不絕惟君能之我雖極慵亦

多往時雖不大亨要以為諧云何今日志願永乖
昔君初哀我方省愆禮不可過未及告論既傷之
後雖說何裨是朋友過恒我忸怩自甯事徂人耶
命耶思今念古增我唏歔嗚呼爵未一命年不四
紀高堂哀號琴瑟委棄有男有女罔知依倚人間
福祿何獨少予天之降酷何獨于君我陳我慟君
能有聞

進士具思孟

嗚呼天喪斯文道其不復國無矜式士有異學哲
人云亡時命由否惟我 耻齋先生氣金光嶽心
似珠水早自觀海久乃升堂有敬其庭有時其

墻擇地而蹈非禮勿視及泉為的興山添簣屋漏
非隱常對赫臨蝨賊雖強寧使來侵深造之道靡
不自得睥面盍背知有成德端拱整衣瞻者起敬
沉潜經傳常若面奉優游禮法實由躬行允矣君
子既明而誠學希殆庶道亞黃中精華所藪和順
斯充處今不汚望古遙集矧伊行源惟日不及既
營其志安用三牲遽當大事云胡獨生於焉自盡
爰及滅性不死者道難謀者命悠悠蒼天曷有定
止福善禍淫徒虛語耳允今之人莫不有言競務
其善孰培其根公維篤行公實匪懈既底無擇敢

言寡悔庶幾得與厥有晉施黃虞既邈世莫我知
咄咄滿園蒙耳黃鍾宛其在田誰識神龍藏修于
室日月于征四十始滿大夢已驚窮通脩短屈信
盈虛公心隨化何與於吾曰余無狀幸承話言丁
寧善誘密若春溫謂是十傳八德之門熟讀玩味
自有好處君其勉之母或自沮余聞斯訓中心樂
之返而省焉有汗沾衣於後數月公丁內艱數往
不可徒自盤桓惟冀服闋永以依歸孰謂今者而
至於斯聞公惟幾余有所拘不親問疾不親舉扶
及至易簀無所服役實負厚義徒增忤怵側聞遺

訓難禁連洩玉色金聲永闕重泉精英之氣尚應
窮天殉身而逝蘊而不傾必為雨露以利生靈師
曰花潭友有伊齋獨不及傳是疾余懷狂瀾既倒
墜緒誰尋異紆歎格式昭菲忱

內子挽詩附

弘文館副提學朴淳

思庵

曾尋師友屢敲門一飯恩深雜佩分永嘆山陽無
舊侶誰憐寡婦著高文未將蘭室存交道又送哀
笳落隴雲獨有衰顏萬行淚空憑挽曲臨雙墳

刑曹參議洪天民

早將貞潔配真儒兩義從知信不孤舉案一心相

對敬枯形十載未亡軀猶存白壁連城重克守青
檀舊業俱紗幔傳經成故事諸郎無地盡怡愉

奉常寺僉正楊士俊

平生元妄 耻齋公訓及齊眉兩肅雍女子有行
思因極死生成說義何窮哀深一毀身隨露慶秀
雙珠學繼功誰借張君十字誄貞碑長照婦林中

神道碑銘 并序

可臣少時即聞洪耻齋先生學問志行之懿為一
時諸賢所推服而未得其詳及今衰病屏伏湖鄉
先生胤子唐興相公辱許可臣有相知之義連家

之分一日乃以先生遺藁遠授窮山樵牧之社而屬以先生神道之銘辭意懇勤有大感動人者可臣極知不敢當此責顧惟當世之典文鉅公彬彬然也相公不求於彼而屬之可臣其意或有在也使人一味惶恐不敢以不文辭乃拜受其先藁而盥手敬讀之矍然起而歎曰生長東南未知有程伯醇此陳忠肅責沈文所以作也今以淺見弱筆摸寫先生德業之萬一以贖可臣孤陋寡聞之罪抑或一道也謹按南陽洪氏為國大姓而先生之系乃出唐八學士之一遂有唐城之別自後達

官偉人世不乏出至五代祖諱師錫功名聲聞尤
卓卓不群 贈謚莊襄高祖諱季洧進武司勇曾
祖諱貴孫禦侮上護軍祖諱以平成均司成 贈
吏曹判書考諱德演文科僉知中樞府事 贈左
贊成妣龍仁李氏虞侯思良之女生五男先生其
長而諱曰仁祐應吉其字也生有美質溫良莊重
未弱冠而能振拔流俗脫然有守死喜道之志律
守制行一遵小學鷄鳴而起盥櫛危坐竟日夜嗒
然几案間無雜書常目在之者惟心經近思錄而
於中庸首章大學誠正修三章益自力焉究索體

驗為一生施功之地言行一致表裏無間以至旁
置白黑豆驗其一念之所發隱微幽獨之地功夫
嚴密無愧於息有養瞬有存之訓要之其學實見
得千差萬別都自一本中出來分明故其一言一
行無非截然整整齊齊觀其答史官尹殷輔書卒
之問與程伊川答溫公給事中之問相類此等語
嘿之節在大賢猶或難之而先生從容焉其與一
時泮宮諸生論事不激不媮動有經據便有為國
以禮底氣象所與遊皆當世名賢如蘇齋盧先生
草堂許先生最有道義黜濯之益當 仁廟在儲

聖學日就。蘇齋為宮僚書筵講說。或有疑義。輒就先生正之。先生辨釋精明。資益甚多。徐花潭先生嘗云。多閱志學之人。可與進步者。惟洪某一人。先生最後師友。退溪老先生其所論難多。是操戈入室。故老先生有云。每與接語。深覺洗去蒙滯。又曰。古人雖在服中。講學往來。書簡亦嘗廢。此後雖在廬所望。勿廢相問。老先生有里於先生之警。益如此。羅整菴欽順分人心道心為性情體用之別。士之過於高明者。又從而為之說。而立亦懺焉。先生獨辨羅見之非。以為作兩般看。最是錯認羅公之

學未可謂儘出正老先生深以為是靜菴趙先生
逢時不幸未得究其設施其志行之述人皆指為
禍門而關於編次先生恨其愈久而遂泯無傳據
事撫實撰次行狀使他日秉筆者有所考據遊關
東有錄文章贍詳使見之者一覽了然退溪跋而
贊之士類傳誦為親之故雖屈意舉業而亦不屑
屑焉中丁酉生負其終不偶命也乙巳仁廟賓
天飲漿迄成服疏食終其月方喪盡禮古未有如
先生者先生齋號初用敬字後易以耻草堂問其
故荅曰點檢從前歲月了無一得將恐未免為流

俗中人以故易之庶有所勉其後又作居室箴以
自警曰甬得甚處其提省日進之功皆此類也其
尤所難者己卯之後茲亮餘孽經構仇讐之禍世
之端人正士流放竄殛極其酷烈門生知舊號以
道義相講刺者改頭換面做若平生素昧者然過
其門而不顧者滔滔先生特立其間不懼不撓雖
海島絕塞之遠同人寄問切磋勸勉意極纏綿有
何可不信一命字不紓遠懷等語其他名卿善士
之喪吊死問生禮所當為者不避時忌曲盡情禮
人亦不得以此而餉禍於先生信乎朱夫子所謂

品稍越真不啻九牛一毛而如先生者求之今古絕無而僅有者也先生天性至孝癸丑遭喪成公之憂歆粥泣血羸毀不起時嘉靖甲寅十一月丁未也明年二月葬于驪州治北大松里丙坐壬向之原享年四十老先生為文以祭之歷舉先生孝友之實樂善之誠寸華之美學問之明賦德之厚稟壽之嗇而痛惜之豈無所實見而云然也天若假之以年至於養深積厚矜持者純熟嚴厲者和平水到船浮左右逢原則其成已成物之功豈止於此而已乎嗚呼惜哉夫人金氏平陽府院君承璽之

後郡守希稷之女也敬事君子而孝奉舅姑氏
性嚴少假借而夫人每得其歡心賢孝之稱內外
無間先生之歿子幼女弱夫人左提右挈納於義
方終能使之成立不賢而能如是乎後先生十有
四年而卒祔葬于先生之左噫天果不可必乎先
生雖不得仁者之壽畢竟不匱於錫類聯珠疊璧
承家繼業有以益大先生門戶之傳曰進曰迪早
擢巍科俱登顯仕進今為忠勤貞亮効節協策扈
聖功臣輔國崇祿大夫唐興府院君兼知 經筵
事迪以文學顯賜暇湖堂將大用於世而不幸早

歿官至司憲府執義以唐興之貴推恩先生 贈

純忠積德補祚功臣大匡輔國崇祿大夫議政府

領議政兼領 經筵觀象監事唐陽府院君妣

贈貞敬夫人長女適濟用正李景嶸次適司評李

文會唐興先娶坡平尹氏敦寧僉正 贈吏曹判

書應奎之女生男汝栗郡守先亡後娶蔚山朴氏

司醞署令宜男之女執義先娶士人韓說之女後

娶鏡城判官 贈左贊成韓孝胤女生二男一女

長汝翼縣監次汝亮刑曹佐郎女適生負姜弘勸

監正生三男一女長堪司憲執義次禧悼女適郡

守尹仇司評生一男一女男曰奇男女適監察趙
弘瑞汝栗娶退溪李先生之孫直長安道之女生
三男曰有煥縣監曰有炯有燦有燦早夭先生側
室子述生一男曰汝恪何其子孫之賢而多也此
殆天意也銘曰君子之學為已而已已之不為是
乃為利嗟惟先生學純而正求之日用本之心性
惟幾惟微更審于行日親有道激昂奮發有聞斯
行勇進不輟一棒條痕一摑掌血入孝出悌餘力
學文堅志苦節富貴浮雲出門承事如賓如祭伊
洛的源鄒魯遺緒五穀將秋未穫而隕世道衰日

取春遺稿附錄

儒林厄運天不復矣憂將曷極立石琢辭弟子是
則萬曆三十七年十二月日奮忠出氣合謀
迪教清難功臣正憲大夫宣原君洪可臣撰

墓誌銘

嘉靖甲寅十一月丁未成均生負洪先生諱仁祐
年纔不惑居外艱過毀而卒其何以勸天下之孝
子乎賢不必貴仁不必壽一至於此天未定而然
耶何其不可必之甚也其胤子唐興府院君進以
家傳詩禮俯就科甲秩躋公孤名登鍾鼎推恩
贈於先生極人臣之官爵天於是乎定矣謹按洪

氏譜於南陽世傳其先來自上國即高句麗時
唐季所遺八學士之一也積累之厚繼出偉人曰
復曰由道皆擢顯仕入我朝有知中樞院事諱
師錫受知獻陵立功征西贈謚莊襄於先生
為五代祖也高祖諱季洵進武司勇曾祖諱貴孫
禦侮上護軍祖諱以平成均館司成贈吏曹判
書通經傳敦睦愛世稱謙厚君子考諱德演文科
僉知中樞府事贈議政府左贊成深於經史守
道不撓用是屯蹇妣龍仁李氏觀察使伯持之後
虞侯思良之女允毓五男先生乃其長也生而孝

敬祥順目濡耳染於家庭典訓之內未弱冠慨然
有志於性理之學篤信好古必以聖賢為可法平
居律身小學雞鳴盥櫛整襟危坐堅苦刻厲人所
不堪雖嚮晦宴息之際亦未見其有惰慢之容常
讀心經近思錄諸書而喫緊服膺於中庸首章大
學誠正修等章以為求端用力之地乾乾惕若反
躬踐實隱微幽獨之中愈嚴愈密嘗置白黑豆以
驗念慮之微端莊凝重履繩蹈矩絕意外慕斷斷
以崇德廣業為期所與皆一時名賢如盧蘇齋許
草堂諸公最其道義相長麗澤切磋者也 仁廟

在儲聖學日進蘇齋為官僚凡遇書筵上疑難處
輒求相質多所資益後謫海島先生抵書乃舉濂
溪令二程尋孔顏所樂何事伊川見人靜坐嘆其
善學等語勉之以靜中體認喜怒哀樂未發前氣
象仍寄以詩曰寂未動時須顧體感方通處可求
根中何湛一微難見誠固散殊養則存蓋慮後學
易差於分殊處也徐花潭嘗語人曰近來志學可
與進步者洪某一人而已金慕齋亦亟稱其志學
有操行退溪李先生當世儒宗也晚而相得義無
師友面論書質講磨益精後讀羅整庵困知記有

以道心為性人心為情之說力辨其不然退溪是
之及先生之歿退溪為文而祭之略曰眷眷孝友
之實懇懇樂善之誠燁燁寸華之義孳孳學問之
明天之何為既賦君以如是之厚而乃獨壽之嗇
而禍之酷耶其見重於先正類此嘗得金寒暄自
警錄手書一通朝夕觀省恨不得同時而親炙焉
趙靜庵德行事業久未有敘述先生深懼道脉泯
沒旁搜廣採撰次行狀使有所考據於他日其於
文章不甚經意而天分高邁機軸自別凡有所作
筆力道勁論議洒脫有非騷人寸士疲精竭神者

之所可及雖為親屈混迹塲屋而實未嘗屑屑於
舉業自中丁酉司馬以來亦不偶焉數也悶親瘠
而不委庸醫則博覽方書備知用藥之要友諸弟
而不煩外傳則隨寸誘掖並為知名之士哀人有
喪悉心經紀或手製裘服而與之凡聞名卿賢士
之喪必去肉數日傷世道也 仁廟賓天慟切攀
髻疏食水飲不以韋布而殺其節及至癸丑贊成
公之憂如疑如慕必誠必信瞿瞿皇皇啜粥泣血
一於禮而不苟不自覺其奄忽尚忍言哉尚忍言
哉乙卯二月葬于驪州治北大松里丙坐壬向之

原先生字應吉初號敬齋後改以耻資稟粹義器
宇沉靜感發最早超向甚正當己卯士禍之餘道
學為世大禁而能自振拔窮羣洛建之墜緒與二
三同志講明不輟若將終身世之臭味不同者宜
如何其忌嫉而繼以有乙巳之獄知舊諸人誅竄
相踵士或過門縮頸不敢視先生獨立不懼吊死
問生情禮無缺此實人所難為而累亦不及豈非
忠信服人而然也平生為學切問近思居敬窮理
勉勉循循不為浮泛凌躡之歸至三十而易齋號
昂之以恐為流俗之人將四十而箴居室警之以

甯得甚康之語其進修之功提察之方未始須臾
息亦未始須臾忘也使其天假之年得以優游涵
養其精力久則其所造詣烏可限量也夫人金氏
順天望族平陽府院君承憲之後郡守希稷之女
肅雍事君子孝順奉舅姑姑性嚴少假借而每稱
為賢婦其侍母夫人之病頃刻不離側嘗糞驗差
處盡至行天性然也及失所天子女皆弱左提右
挈教以義方終有所成就不賢而能如是乎後先
生十四年隆慶丁卯而卒享壽四十九附寧先生
之宅追榮貞敬之封凡生二男二女長即唐興策

忠勤貞亮効節協策扈 聖功臣聞望臨一時次
迪出繼從叔父仁範後早登第盛之王君湖堂將
大用於世不幸仕止司憲府執義女長適濟用監
正李景崐次適司評李文會側室有子述唐與先
娶尹氏 贈吏曹判書應奎之女生男汝栗進士
順川郡守繼室朴氏司醢署令宜男之女執義娶
贈左贊成韓孝胤之女有丈夫子二人汝翼進士
翊衛司司禦汝亮進士刑曹佐郎女壻士人姜弘
勳監正生三男長懋議政府舍人次懋懋女壻郡
守尹僊司評生子奇男女壻監察趙弘瑞順川娶

直長李安道之女生三男曰有煥四山監役官曰
有炯曰有燦幼善慶之家宜其子孫之振振也銘
曰有興其才不待文王吾道之東何嘆偏荒孝弟
親仁餘力乃學埽樸有素格致其闕萬理一原心
為主寧靜存動察無時不在方寸昭昭亦具太極
天德王道要以謹獨對越上帝惟日孳孳過鐵門
關持玉鑰匙一箇敬字貫徹始終誠明兩進庶幾
極功豈意斯人早年不淑孔徒顏回程門與叔自
古而然天亦無情瑶琴傳後世其家聲

萬曆三十四年九月 日大匡輔國崇祿大夫

議政府左議政兼領 經筵監春秋館事 世

子傳沈喜壽 撰

墓表陰記

己卯以後道學為世大禁士皆馳騫於訓詁文章之末不復知有儒者事時則有若耻齋洪先生振拔流俗慨然有求道之志立心行事直以聖賢為標準不幸早世當時之人固已惜之先生既歿士論稍行於世則後生小子聞先生之風者莫不尊尚景仰知所矜式後五十有一年以嗣子唐興府院君進貴 贈純忠積德補祚功臣大匡韓國崇

祿大夫議政府領議政兼領經筵觀象監事唐陽
府院君其種學積德能享身後之報若是其不忒
嗚呼世之為善者亦可以有勸矣先生諱仁祐字
應吉耻齋其號世傳唐季遣八學士教國人洪其
一也賜貫南陽以唐城名其居在麗朝有諱復諱
由道世有顯位入本朝有諱師錫征西有功官
至知樞謚莊襄即先生五代祖也祖諱以平成均
司成贈吏曹判書考諱德演文科僉樞贈議
政府左贊成妣貞敬夫人龍仁李氏觀察使伯持
之後虞候思良之女以正德乙亥生先生自少勵

志為學平居以小學自律終日危坐家屬未見有
惰容几案間常對心經近思錄等書傍置白黑豆
以驗念慮之微堅忍刻苦不少懈遍交當世間人
以資切磋如盧蘇齋守慎許草堂晦寂以道義相
許仁廟在春宮聖學高明蘇齋為官僚每於書
筵有疑難輒來問質多所發明後在謫中先生致
書勉以用功於喜怒哀樂未發前戒其或差於分
殊仍寄以詩有寂未動時須顧體感方通處可求
根中何湛一微難見誠固散殊養則存之語晚得
退溪李先生滉為師友講廟論難造詣益精力辨

羅整庵人心已散道心未散之非退溪深然之徐
花潭敬德嘗語人曰年來志學可與進步者唯洪
某一人而已金慕齋安國亦亟稱其志學有操行
其見重於先輩可知也先生之學常用力於中庸
首章大學誠正脩章而以己心為嚴師篤信伊川
天德王道在謹獨之訓嘗作居室箴以自警為文
章畧不經意而拔出尋夷遊關東有錄退溪跋而
贊之趙靜庵志行之述亦為士類所傳誦以親故
不廢舉業而未嘗屑屑焉嘉靖丁酉試司馬而止
時士禍相仍危機屢發儕輩之刑寘相繼先生吊

死問生禮無所缺人皆危之而處之如常聞名賢
之卒必素食累日為世道歎 孝陵賓天飲漿迄
于成服疏食以終其月其謹於方喪者如此孝友
之行出於天性父母有疾為學醫書知用藥之方
誘掖羣弟使識為學之道而能怡怡如也癸丑丁
贊成公憂喪祭一以禮比卒哭啜粥曰毀成疾越
明年十一月丁未竟不起春秋僅四十卜葬于驪
州北面大松里丙坐壬向之原退溪祭以文畧曰
眷眷孝友之實懇懇樂善之誠燁燁才華之義孳
孳學問之明天之何為既賦君以如是之厚而乃

獨壽之嗇而禍之酷耶觀於此亦足以知先生之
所存矣夫人金氏順天大姓府院君承憲之後郡
守希稷之女貞恪孝順克配君子母有病嘗蠶
繭差劇姑性嚴少許可而每稱其賢俾為諸婦式先
生之歿子女皆幼教以義方以至成立終能受其
厚杜吁亦賢矣生正德己卯卒隆慶丁卯壽四十
九合葬于先生之左從 贈貞敬夫人先生有二
男二女男長即唐興公登庚午文科歷敷華顯策
忠勤貞亮劾劄協策扈 聖功臣今以本封兼判
義禁府事知 經筵事次迪登壬申文科以文行顯

賜暇讀書堂終司憲府執義女長適濟用正李景
嶸次適司評李文會唐興有男汝栗郡守執義有
男汝翼縣監汝亮監役女姜弘勳正有男愷舍人
次愷悼女縣監尹忱司評有男竒男女直長趙弘
瑞汝栗男有煥有炯有燦先生側室子述男汝恪
唐興公以浚謙有連家之義命表墓道謹依家狀
叙其梗槩若其學行德懿之詳太史氏已大書後
之人必有能言者爾

萬曆三十二年八月 日嘉善大夫行弘文館

副提學知製 教兼 經筵叅贊官春秋館修

撰官韓浚謙 撰

行狀

先府君姓洪氏諱仁祐字應吉世傳唐季遣八學士教高勾麗國人洪其一也賜系南陽名所居曰唐城事具輿地誌世為顯官高麗中葉有諱復官至禮史諱由道同知密直司事入本朝有諱師錫大為獻陵所器以屬英廟其後征西有功位至資憲大夫知中樞院事贈謚莊襄公高祖諱季洎進武副尉左軍司勇曾祖諱貴孫禦侮將軍忠佐衛上護軍贈通訓大夫通禮院左通禮

祖諱以平通訓大夫行成均館司成

贈資憲大

夫吏曹判書兼知

經筵義禁府春秋館事世子

左賓客考諱德演折衝將軍僉知中樞府事累

贈崇祿大夫議政府左贊成兼

世子貳師知

經筵春秋館事娶龍仁李氏觀察使伯持之後虞

侯思良之女生府君於正德乙亥溫恭孝悌得之

天性年未弱冠勵志聖賢之學惟日居敬整襟危

坐如見大賓夜分乃寢既寤未嘗偃卧枕上雖對

家屬必具冠帶刻勵不懈人未見其有惰容几案

間相對唯心經近思錄等書而以中庸首章大學

誠意正心脩身章為求端用力之方而以己心為
嚴師篤信伊川天德王道在謹獨之訓嘗置白黑
豆於器以驗念慮之微克勤小物分毫不遺而斷
斷以崇德廣業為期少時在山寺手抄小學書有
一老衲曰自剃髮閱書生多矣未有如公夜不眠
曉起盥櫛終夕危坐嗒然不言之人蓋深服其攻
苦而嘆異之也遍交當世有識之士而以蘇齋廬
相守慎草堂許監司曄為道義交相與切磋晚得
退溪李先生泚為師友進修之功益切於講磨踐
履之實日深於造詣嘗謂人子不可以不知醫博

觀方書精究旁通王父僉樞公久嬰疾病其所用藥不專委醫或手自診劑而收效亦多羣弟既長誘掖提撕養其不中使之有所成就凡民有喪吊慰奠賻克盡情禮或手裁喪服必合古制 仁廟在春宮聖學高明書筵講讀多所論難穌齋時入講院有所疑則輒來問質府君反覆詳訂要得其當而後已齋號初用敬字後改以耻許草堂問其故府君荅以點檢從前歲月了無所得年至三十恐未免為流俗人以此易之庶有所勉嘗得金粟暄自警錄曰雖不得親炙於一時今得遺訓在我

自勉手書一通以寓欽慕之意雖以慰悅親心不
廢舉業亦不屑屑於科文歲丁酉中司馬試而止
身不見用於時而聞朝有疵政則輒憂形於色名
卿善士之卒必素食累日為世道嘆 孝陵賓天
飲漿迄成服䟽食終其月以致謹於方喪已卯士
禍之後重之以乙巳斬伐之酷士氣摧隳俗尚質
質道學為世大禁而府君獨立不惧與二三同志
講明論辨世之不悅者斥之以已卯餘習甚者指
以為黨至欲䟽列名字榜示學堂一時儕輩刑殺
流竄相繼而府君處之如常吊死問生禮無所缺

人皆危之而府君不為之撓權奸亦莫能加害焉
壬子作居室歲有年近四十爾得甚麼之語靜庵
趙先生先祖實得河洛之嫡統而既被酷法人傷
於虎無敢紀其實迹德行事業愈久愈失將至泯
沒府君盡心求摭或得之士友傳信或叅以在人
耳目撰次行狀俾後人有所考據蘇齋久在謫中
府君寄以書曰近讀延平書乃知濂溪令二程尋
孔顏所樂何事伊川見人靜坐輒嘆其善學故龜
山豫章延平考亭相傳心法皆用力於喜怒哀樂
未葢前氣象所謂立天下之大本曾子之唯子思

之致中孟子之性善張子之理一同貫說地頭若
於這路脉不分明用功其分殊處必差因繼以詩
曰嘗思尼父欲無言性命流行貫一原寂未動時
須顧體感方通處可求根中何湛一微難見誠固
散殊養則存晚會天人非二義遺經獨抱共誰論
其微意盡可見也後得困知記簡退溪曰其以人
心為己義道心為未義作兩般者最是錯認了豈
辨倒王陽明差路乎然則羅整庵亦未可謂儘出
正者天下道學難得嫡派如是退溪深然之花潭
徐公敬德嘗語人曰年來志學可與進步者唯洪

某一人而已慕齋金相安國亟稱其志學有操行
晚好義經手不釋卷至於寢疾猶自摹寫啓蒙圖
說作為小帖置諸案上潛心玩索焉歲癸丑丁嚴
憂喪祭盡禮必誠必信既葬居廬朝晡上食之外
別行定省日詣塋側循繞哀省饘粥蔬食一從禮
文甲寅十一月十日丁未竟以過歿卒僅享不惑
之年易簀前一日名二子而字之教女子以宜家
之道且諭孤進曰小學近思四書之後周易不可
不學遺訓不昧常若在耳嗚呼勸哉退溪先生祭
之以文略曰眷眷孝友之實懇懇樂善之誠燁燁

才華之義孳孳學問之明天之何為既賦君以如是之厚而乃獨壽之嗇而禍之酷耶云云明年二月葬于驪州北面大松里丙坐壬向之原先妣順天金氏平陽府院君承靈之後郡守希稷之女少先君五歲承事君子奉養舅姑極其孝敬妯娌之間人無間言王母李氏性嚴少許可而常稱為賢婦使一家矜式之外王母李氏患危証晝夜侍側不離頃刻至於嘗糞以驗差劇府君疾病日祈北辰求以自代府君指叔父諱仁祉而語之曰家事一聽此弟先妣慟泣受命事無專制必稟議而行

之沒身不替教誨子女雖甚慈愛不少假借冀納
義方宗黨皆稱之隆慶丁卯卒合葬于先府君之
左男進猥承遺訓竊祿于朝以 朝命 贈先府
君純忠積德補祿功臣大匡輔國崇祿大夫議政
府領議政兼領 經筵觀象監事唐陽府院君先
妣貞敬夫人生二男二女男長進今為忠勤貞亮
効節協策扈 聖功臣輔國崇祿大夫唐興府院
君無判義禁府事知 經筵事次迪中訓大夫司
憲府執義無知製 教出繼府君從弟府使仁範
後女長適濟用監正李景嶸次適掌隸院司評李

文會進先娶坡平尹氏敦寧府僉正 贈吏曹判
書應奎女生二男一女男長汝栗順川郡守餘皆
夭後娶蔚山朴氏司醞署令宜男之女迪先娶士
人韓說女後娶鏡城判官 贈左贊成韓孝胤女
生二男一女男長汝翼翊衛司司禦次汝亮刑曹
佐郎女士人姜弘勳濟用正生三男一女長懋議
政府舍人次懋憚女郡守尹旼司評生一男一女
男曰奇男女監察趙弘瑞汝栗娶退溪李先生之
孫直長安道女生三男有煥四山監役官有炯有
燦府君側室子述生一男汝恪府君遠諱之辰不

肖孤進年在稚童志行之述久未屬筆中遭亂離
家籍散失僅記其平日所聞於先執者無考曰錄
所載略叙梗槩如右

長男忠勤貞亮効節協策扈聖功臣輔國崇
祿大夫唐興府院君兼判義禁府事知經筵
事進撰

耻齋先生遺稿附錄終



